

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

1. भारती अंतरिक्ष अनुसंधान संगठन - इसरो आसेआ अज्ज रातीं श्री हरिकोटा थमां द'ऊं उपग्रैह्ं गी अंतरिक्ष च भेजेआ जाहग जेहदा मकसद कक्षा च अंतरिक्ष यानें गी जोड़ने ते बक्ख करने दी प्रक्रिया गी दर्शाना ऐ।
2. मुखमंत्री ओमर अब्दुल्ला होरें इक उच्ची सतह दी बैठक लाइयै बर्फबारी दे बाद सेवाएं गी परतियै ब्हाल करने सरबन्धी जतनें दा जायजा लैता।
3. उपमुखमंत्री सुरिंदर चौधरी होरें कटड़ा दा दौरा लाइयै मुकामी मसलें गी तौले हल करोआने दा वायदा कीता।
4. केन्द्री राज्यमंत्री डाक्टर जीतेन्द्र सिंह होरें रामबन च दिशा दी बैठक लाई। मंत्री होरें जनता दरबार गी संबोधित कीता ते लोकें दे मसलें गी तेजिआ कन्नै हल करोआने दा जकीन बी दोआया।
5. रजौरी जिले च विकास दी तांहग आहला अकांक्षी ब्लाक ख्वास, भारत च ऐसे 500 ब्लाकें दी दर्जेबंदी च 453 नम्बरै थमां 5मीं थाहै पर आई पुज्जा ऐ।

<><><><><><>

ISRO-Spadex

भारतीय अंतरिक्ष अनुसंधान संगठन इसरो अज्ज रातीं 9 बज्जियै 58 मँटें पर श्री हरिकोटा सवां दऊं उपग्रैहें दा प्रक्षेपण करोग। एहदा मकसद कक्षा च अंतरिक्ष यान भेजने जां हटाने दी प्रक्रिया गी दर्शाना ऐ। इस प्रक्षेपण दे कन्नै गै भारत एह उपलब्धि हासल करने आहला दुनिया दा चौथा मुख्य बनी जागं इसरो दा भरोसेमंद प्रक्षेपण यान PSLV/ 60 जनवरी म्हीने दे पैहले हफ्ते च दऊं उपग्रैह SDX-01 ते SDX-02 गी 476 किलोमीटर दी रक्षा च स्थापित करोग ते प्रक्षेपण यान हटाने दा अजमैशी प्रदर्शन बी करोग। स्पेडेक्स मिशन अंतरिक्ष च भारत दे भविष्य दे जत्नें च मता महत्वपूर्ण कदम साबत होग। इनें जत्नं च चन्नै दी सतह परा बड्डे जन्नो ते मिट्टी आहन्ने, प्रस्तावित भारतीय अंतरिक्ष केंद्र स्थापित करने ते चन्नै पर अंतरिक्ष यात्रिणं गी तोआरने दे जत्न शामिल होन। अजें तोड़ी शड़ा अमरीका, रूस ते चीन नै गै स्पेड डॉकिंग तकनीक च महारत हासल कीती दी ऐ।

<><><><><><>

EAM-Qatar

विदेश मंत्री डाक्टर एस. जयशंकर होर अज्जै थमां कतर दे त्रऊं दिनें दे दौरै पर होडन। इस दरान ओह कतर दे प्रधानमंत्री ते विदेश मंत्री शेख मोहम्मद बिन अब्दुल रहमान बिन जास्सिम अल थानी हुंदे कन्नै मलाटी करडन। विदेश मंत्रालय नै इक बयान जारी करियै आखेआ ऐ जे इस जातरा कन्नै दौनें मुख्यें गी सियासी, बपारिक, रास-पूजी, ऊर्जा, सुरक्षा, सांस्कृतिक ते लोकें बशकार संपर्क सने दपक्खी सरबंधें दे बक्ख-बक्ख पैहलुएं दी समीक्षा दा मौका मिलोग। एहदे अलावा आपसी हितै आहले इलाकाई ते अंतर्राष्ट्री मुद्दें पर बी विचार बटांदरा कीता जाहग।

<><><><><><>

LG-School

उपराज्यपाल मनोज सिन्हा होरें कल आखेआ ऐ जे राष्ट्र दा भविक्ख स्कूलें च तय हुंदा ऐ। स्हादी शिक्षा बवस्था दा लक्ष्य हर जने गी शिक्षा दे बेजोड़ मौके उपलब्ध करोआना ऐ तां जे ओह अपनी काबलियत कन्नै किश नमां करी सकन ते राष्ट्र निर्माण च अपना जोगदान देन। श्री सिन्हा हारें ह गल्ल जम्मू यूनिवर्सिटी दे जनरल जोरावर सिंह आडीटोरियम च इक निजी स्कूल दे सालाना दिवस समारोह दौरान हिस्सा लेंदे होई आक्खी। अपने संबोधन च उपराज्यपाल होरें स्कूल प्रबंधन, शिक्षकें ते विद्यार्थियें गी सालाना दिवस पर अपनियां शुभकामनां दितियां। श्री सिन्हा होरें इस गल्ला पर लौह पाई जे स्कूली शिक्षा दा मकसद बच्चें दी बौद्धिक क्षमता गी सामने आहनना ऐ। एलजी होरें आखेआ।

<><><><><><>

CM-Meeting

मुख्यमंत्री उमर अब्दुल्ला होरें बर्फबारी मगरा जरूरी सेवाएं दियें बहाली दियें कोश्टें दी समीक्षा करने आस्तै कल इक उच्ची सतह आहली बैठक दी वीडियो कांफ्रेंसिंग रायं प्रधानता कीती। बैठक च जम्मू-कश्मीर दे बर्फबारी कन्नै प्रभावित इलाकें पर टकोहदा ध्यान दिता गेआ। जम्मू खिते दे बर्फु कन्नै प्रभावित जिलें दे उपायुक्तें बिजली, पानी दी दस्तेयाबी ते शइक राबते बहाल करने बारै जानकारी दिती। मुख्यमंत्री होरें अधिकारियें गी राबते शिड़ें थमां बर्फ हटाने गी पहल देने ते राष्ट्रीय जरनैली शिड़कें पर गइडियें दी आओजाई गी यकीनी बनाने दे निर्देश जारी कीते। उनें आम लोकें दियें शकैतें पर तौलें कार्रवाई करने ते औंदे दिनें दौरान होने आहली बर्फबारी

ताई तैयारियां बदाने पर जोर पाया। मुख सचिव अटल डुल्लू, अतिरिक्त मुख सचिव धीरज गुप्ता, जम्मू दे डिविजनल कमिशनर ते होर दुए आला अफसरें वीडियो कांफ्रेंसिंग रायं लग्गी दी इस बैठक च हिस्सा लैता। मीडिया गी संबोधित करदे होई उमर अब्दुल्ला होरें आखेआ।

<><><><><><>

LG-Delegations

उपराज्यपाल मनोज सिन्हा होरें कल बक्ख-बक्ख प्रतिनिधिमंडलें कन्नै मलाटी लाई जिंदे च डी.डी.सी पुंछ ताजीम अख्तर, डी.डी.सी सेरी संगीत शर्मा, नौशेरा थमां बीजे दे नुमाइंदें ते बपार मंडल राजौरी दे मिम्बर शामिल हे। इंदे कन्नै श्री सिन्हा होरें विकास सरबन्धी बक्ख-बक्ख मुद्दें पर गल्ल-कत्थ कीती। इक्क होर दुई बैठक च डॉक्टर बलजिंद्र कौर हुंदी नुमायंदगी च जम्-कश्मीर खो-खो, एसोसिएशन नै एल.जी होरेंगी नमीं दिल्ली च खो-खो विश्व कप 2025 दा उद्घाटन करने लेई साद्दा दिता। इंदे अलावा 3 बारी एवरेस्ट पर चढ़ने आहले कर्नल रणवीर सिंह जम्वाल होरें बी कल लग्गी दी मलाटी दौरान एल.जी होरेंगी अपनी कताब हर शिखर तिरंगा भेंट कीती।

<><><><><><>

Cy CM Reasi

उपमुखमंत्री सुरिंद्र कुमार चौधरी होरें मकामी बसनीकें दियें दिक्कतें-परेशानियें ते चैंताएं दा जायजा लैने ते उंदा हल कइडने ताई कटड़ा दा दौरा लाया। दौरे दौरान नकां प्रतिनिधिमंडलें उपमुखमंत्री हुंदे कन्नै मलाटी लाइयें उनेंगी अपनियें शकैतें ते मंगें कन्नै अवगत करोआया। प्रतिनिधिमंडलें कन्नै गल्ल-कत्थ करदे होई उपमुखमंत्री होरें आखेआ जे सरकार लोकें कन्नै

पूरी तगडेयाई कन्नै खड़ोती दी ऐ ते उंदी भलाई बेहतरी लेई पूरी चाल्ली बचने बज्झी दी ऐ।
उपमुखमंत्री होरें लोकें गी भरोसा दोआया जे उंदियें शकैतें ते मंगें पर पैहल दी विनाह पर गौर
कीता जागं उनें आखेआ।

<><><><><><>

MoS Disha Meet

केन्द्री राज्यमंत्री डाक्टर जीतेन्द्र सिंह होरें कल रामबन च जिला विकास तालमेल ते निगरान
कमेटी - दिशा दी इक बैठक लाइयै उत्थे जारी परियोजनाएं ते आम लोकें दे कल्याण सरबन्धी
योजनाएं दा जायजा लैता। उनें हाल दिएं बरखें ते सर्द मौसमी हालात दरान बिजली ते पानी दी
सप्लाई सरबन्धी फौरी मसलें दी बी समीक्षा कीती। बैठक दरान मंत्री होरें पीएम सूर्य घर मुफ्त
बिजली योजना, पीएम विश्वकर्मा योजना ते खासतौर उप्पर 70एं बरें शा मती उम्मी दे बुजुर्गे
लेई आयुष्मान भारत प्रधानमंत्री जन आरोग्य योजना बारें लोकें अंदर बद्धोबद्ध जागरूकता पैदा
करने दी जरूरतें पर जोर पाया। डाक्टर सिंह होरें जल जीवन मिशन च पेश आवै करदी रुकावटें
बारें बी चर्चा कीती। उनें एह ऐलान बी कीता जे 'इक जिला इक उत्पाद' तैहत आहन्ने गेदे
मखीर गी सरकारी समारोहें दरान इक यादगार दे तौर पर भेंट कीता जा करोग ते कन्नै एरोमा
मिशन दे तैहत लवेंडर दी खेती दा दायरा रामबन जिले तोहड़ी बधाया जाहग। तोआई डाक्टर
सिंह होरें रामबन च गै इक जनता दरबार लाइयै मुकामी लोकें दिएं समस्याएं गी सुनेआ ते
मौके पर गै केई सारे मसलें दा नबेड़ा बी करोआया। उनें सरबन्धत अधिकारिणें गी निर्देश दिते जे
लोकें दे जायज मसलें गी पैहल दी बिनाह पर हल करोआया जा। जनता दरबार दे दरान बड्डे
प्रशासनिक अफसर बी उत्थे मजूद हे।

<><><><><><>

Khwas Ranking

इक्क टकोहदी उपलब्धि तैहत राजौरी जिले दे ख्वास ब्लाक नै दर्जे आहली लिस्ट च असरदार छलांग लाई ऐ। नीति आयोग आसेआ ब्लाक दे तौरा पर मानता हासल ख्वास, समूलचे देसै दे 500 ब्लॉकें चा पैहले दी 453मीं थाहरै परा लम्मी छाल मारदे होई 5मीं थाहरै पर आई पुज्जा ऐ। महत्वै आहली एह तरक्की डी.सी अभिषेक शर्मा हुंदी नुमायंदगी च होई ऐ, जेड़ी असरदार शासन ते मकामी विकास दे बेहतर प्रभावें गी उजागर करदी ऐ।

<><><><><><>

DC Poonch Surprise Visit

पुंछ दे डिप्टी कमिशनर विकास कुंडल होरें कल राजा सुखदेव सिंह जिला अस्पताल दा चानचक्का दौरा लाइयै उत्थे मरीजें गी दिती जा करदी सुविधाएं दा जायजा लैता। डिप्टी कमिशनर होरें इस मौके पर अस्पताल दे बक्ख-बक्ख वार्डें जि'आं एमरजेन्सी वार्ड, गाईनेकोलॉजी वार्ड, फारमेसी, सर्जिकल वार्ड, मेडीसिन वार्ड ते जेरे तामीर क्रीटिकल केयर ब्लाक दी स्थिति दा निरीक्षण कीता। इस मौके पर उनें मरीजें कन्नै गल्लबात करियै उंदी डोल बी पुच्छी। उनें मय्यारी सेहत दिक्खभाल दे महत्वै पर लोs पाई ते सेहत अधिकारिएं गी आखेआ जे ओह मरीजें दी दिक्खभाल ते मेडिकल सुविधाएं गी मती तरजीह देन। अपने दौरे दुरान डिप्टी कमिशनर होरें मेडिकल ते सर्जिकल वार्डें च एयर कंडिशनर लाने सरबन्धी योजना दा ऐलान कीता जेहदा मकसद हर मौसम च मरीजें गी अरामदायक म्हौल उपलब्ध करोआना ऐ।

<><><><><><>

Somavati Amavasya

देसै दे होरनें हिस्सें आहला लेखा, जम्मू संभाग दे बक्ख-बक्ख जिले च बी अज्ज सोमवस्ती मस्या दा पर्व मनाया जा करदा ऐ। जम्मू संभाग दे सांबा जिले च बड़ी मती ठंडु दे बावजूद ऐतिहासिक थाहें पुरमंडल ते उत्तरबैहनी च लोक इस मौके पर पवितर देवका नदी च श्रान करिये मंदरै च मत्था टेका करदे न।

<><><><><><>

Weather Highway

मौसम विभाग दी जानकारी मूजब, जम्मू-कश्मीर दिएं किश थाहें पर अज्ज 30 दिसम्बर ते कल 31 दिसम्बर गी बी बड़ी भारी ठंडु दा प्रकोप जारी रौहग ते तापमान सिफर कोला हेठ रौहग। सैलानिएं ते जातरिएं गी सलाह् दिती गेई ऐ जे ओह् इस अवधि दरान प्रशासन आसेआ जारी मशवरे दी पालमा जकीनी बनान। मौसम विभाग नै औंदी 3 थमां 6 जनवरी दी अवधि दरान उच्चिएं धारें पर दरम्यानी थमां भारी बर्फबारी दी शेंका बी जताई ऐ जेह्दे करी उच्चे प्हाड़ी इलाकें च मजूद महत्वपूर्ण सिड़कें पर आओआई उप्पर माड़ा असर पेई सकदा ऐ। तोआई ट्रैफिक पुलसै मूजब, जम्मू-श्रीनगर राश्ट्री जरनैली सिड़कें पर अज्ज हौली मोटर गड़डिएं, जातरी ते निजी गड़डिएं ते बड़्डी गड़डिएं गी दौनें बक्खी दा आओजाई दी इजाजत दिती गेदी ऐ। उआं केईं थाहें बर्फ जमा होने करी ऐतिहासिक मुगल रोड अजें बी गड़डिएं दी आओजाई लेई बंद ऐ।

<><><><><><>